

MAZARIN

2931

Le Qvarante-cinq faicts ...




RARE BOOK  
COLLECTION



THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL

Mazarin  
2931

UNIVERSITY OF N.C. AT CHAPEL HILL



00023009030



2931  
L E

N<sup>o</sup> 12

QV A R A N T E - C I N Q

F A I C T S C R I M I N E L S

D V C. MAZARIN,

Q V E L E S P E V P L E S

instruits adressent à ceux  
qui ne le sont point.

J. G. V. 41<sup>e</sup>. 27 —

— G. LXIX. n<sup>o</sup>. 4 —

---

M. DC. L.



Ms. 15

1. 2. 3. 4. 5.

M. D. C. L.



*Que les Peuples instruits adressent à ceux qui ne  
le sont point.*

**P**AR tout le Monde il ne se parle que del'opprobre & ignominie qu'encourent les François, de souffrir si longtemps vn Estranger, qui par sa vile naissance, estant le Subiet du Roi d'Espagne, les Maistrise, les Regente, & les meine par le nez où il veut. Les Troyens par vne lascheté beaucoup moindre, furent appelez Troyenes, & ie ne sçay si les François peuuent estre nommez Françoises; effeminez qu'ils sont en ce rencontre, & degenerans de leurs ancestres, attendu qu'ils portent avec tant de patience le ioug que leur impose cét homme, qui pour se mettre mieux à l'abry des orâges, que luy mesmes à excitez, se couure d'un Chapeau Rouge, dont il se sert, comme ces Magiciens de Norouëgue, qui font tourner le vent du costé qu'ils tournent leur chapeau. Certes le Chapeau Rouge ne fut donné à quelques Ecclesiastiques par le Pape Innocent IV. au Concile de Lyon, que pour les obliger à vne perpetuelle souuenance, que toutes les fois que le seruice de Dieu & le salut du peuple le requerroit, ils deuoient estre prests de s'empourprer de leur propre sang. Mais le Mazarin ne semble auoir receu cette couleur de sang en ses habits, que pour estre animé d'espancher le meilleur sang de France, dont il se plaist depuis si longues années, ou pour mieux dire, pour entierement perdre les Princes du Sang de France. Le scelerat qu'il est, ne songe qu'à mettre bas ceux qui l'ont haussé, qu'à perdre ceux qui l'ont fauéné, comme vne nuée qui tasche d'obscurcir le Soleil, qui l'a esleuée de la terre; N'est-ce pas donc maintenant que la France est mal nommée, & qu'elle ne peut estre nommée FRANCE que par



Antiphrase, pour n'estre rien moins que franche & libre, au lieu de serue & poltronne qu'elle semble estre à ce coup, qu'un vilain Aquin a le pouuoir de s'agrandir si fort qu'il agrandit tant de petites gens, & tant de personnes, qui n'ont leur ame susceptible que de sales lucres. Les principales charges du Royaume d'ont il dispose à son gré, ne luy seruent que pour charmer & fasciner ceux qui aboyent contre luy, comme les Poëtes feignent que Hercule iettoit des lopins de chair à Cerbere qui le poursuioit. Ce monstre engourdit les mains de ces ames venales pour estre affranchy de leurs coups, La vaine lueur de ses presens esbloüit leurs yeux pour les empescher de voir les desolations, où il plongea la France. Mais s'il leur reste encore quelque petit rayon de lumiere, ie les coniure de l'arrester sur ces 45. Crimes commis par ce plus grand ennemy que la France ayt iamais eu. Ils apprendront.

P R E M I E R E M E N T, qu'il surprit la Reine par la representation qu'il luy fit de la necessité en laquelle la deffunte Reine Mere se trouua, & que l'ayant persuadée qu'il falloit vser d'œconomie sur les despences des Maisons de leurs Maiestez, il l'obligea par cét artifice de commander à d'Emery Sur-Intendant des Finances, de faire tout ce qu'il luy diroit; si bien que sans perdre temps faisant valoir cette souplesse, il ne surprit pas moins Emery, luy donnant à cognoistre par ce commandement, qu'il auoit la disposition entiere sur luy, aussi bien que sur les Finances. C'est ainsi qu'il ne s'est point espargné de faire valoir cette œconomie à son profit dans la disposition qu'il a eu des Finances par cette adresse depuis l'année 43. à sçauoir, sur quatre vingt quatre millions, à quoy reuiennent à present les deniers des Tailles & des Fermes chascque année, sur ceux du Domaine, des Parties cazuelles, des Decimes, comme sur ceux, qui procuiennent d'une infinité de partis qu'il a fait faire contre le Peuple, puis qu'il ne se trouue personne payée de ce qui est deub par le Roy, les Officiers de sa Iustice, des Finances, de sa Maison Royale, gens de guerre, non plus que les particuliers, qui ont ouuert leurs bourses pour le prest sur les Tailles & autres partis. Au contraire, les vns & les autres se voyent fort esloignés de

rien



rien toucher, & de plus, par cette belle œconomie le Mazarin réduit le Roy à despenfer desia son reueuu de l'an 1653. Au si on s'apperçoit bien que l'or qui a esté espandu par le traffic des Marchands, & qui auoit esté accumulé en France de longue main n'y est plus, & qu'il en est bien loin sous le nom du Mazarin, de son pere & de ses confidans. Si bien que les Commis del'Espargne, des autres Receptes à Paris, Receueurs particuliers & generaux, les Marchands, les Banquiers, comme ceux qui ont encores quelques bourfes se demandent les vns aux autres par tout la France, que sont deuenus deux cens soixante millions qui ont esté conuertis en la fabrique des Louys d'or, desquels il n'en paroist presque point.

2. Qu'il diuertit & enleue hors le Royaume les Finances & les richesses del'Estat; les comprans des sommes immenses iusqu'au nombre de cinquante Millions, ainsi que la Chambre des Comptes en a esclairci le Parlement de Paris; la belle œconomie de Mazarin les a fait monter à cela en vne seule année, au lieu qu'en la plus haute despenfe du feu Roi on ne les a eus que de cinq millions. *Cantariny* & autres Banquiers les confidens, sçauent bien la quantité de remises qu'ils ont faites par change, le nombre des Bordereaux des Louys d'or qu'ils ont enuoyé par les Voituriers vers l'Italie, souz pretexte que c'estoit pour y payer les Armées, y entretenant la guerre à dessein de fauoriser son enleuement, & dans la rareté des Louys d'or en France; on void bien qu'ils sont tres-communs par toute l'Italie, soit par les paragantes qu'il a donnez pour porter son frere au Cardinalat, soit pour les despenfes des somptueux bastimens, soit pour y faire vne réserve de deniers, soit par le coust des dignitez de Noble Venitien pour son pere & pour luy, ce qui l'a obligé de quitter vne partie de douze millions qu'il auoit es mains de quelques particuliers, lesquels le menaçoient de descouurir que c'estoit argent volé à la France; & afin que cela ne fit pas bruit, il s'est accommodé de ses dignitez que ces particuliers luy ont donné en payement, & cette negociation a esté ainsi mesnagée par *Antonio Folgy*, confidant de son pere, qui a par toutes ses lettres fort soigneusement recommandé à son fils Mazarin, & nommément par celles du 15. Avril 1644. où il luy marquoit ces mots en trois endroits precieusement: *Mandate dinares, Mandate dinares, Mandate dinares.*

3. Que les gros mariages par lesquels il veut s'appuyer sur les alliances de ses Niepees dans les hautes Maisons du Royaume, doiuent estre



payez, comme il le prétend par des tailles si précises sur les peuples de France.

4. Que le mesme *Cantarin* a donné sur chaque Louys d'or en échange de monnoye blanche, le prix de six iusques à huit sols de profit par piece pour les voiturier en Italie; & que les voisins & autres personnes ont veu apporter chez luy vne prodigieuse quantité d'argent blanc à millions par des crocheteurs & des charrettes chargées, bien que chacun sçache que son trafic de Banque n'ait iamais accumulé en sa caisse, trente mil liures à la fois.

5. Que la Politique Mazarine est de rendre les Subiets du Roy pauvres, afin de les faire flechir & obeir plus facilement à ce qu'on leur impose.

6. Qu'il tasche de couvrir ce haut crime de vol des Finances du Roy, en voulant persuader toute la Cour & la ville de Paris, qu'il est en vne extreme necessité d'argent par l'emprunt qu'il en a fait de toutes mains, iusques là qu'il a mesme surpris le Prince de Condé, qui luy a presté cinquante mil escus à Compiègne, où la Cour estoit, après la guerre de Paris, De laquelle somme son Intendant Perraut fit emprunt de quelques particuliers, vers lesquels on trouuera cette somme encore deuë par le Prince, ce qui seruira pour desabuser ceux qu'on a persuadé que le Mazarin auoit donné force argent à ce Prince durant cette guerre.

7. Que par ses fourbes, il a fait tousiours esperer la paix generale, quoy que son but n'ait esté que d'entretenir incessamment la guerre, & qu'à cette fin il a rompu le traité de paix, que le Duc de Longueville auoit fait à Munster avec l'Espagne, qui estoit à l'honneur & à l'auantage de la France, pareille à celle des Hollandois, afin d'auoir vn pretexte continuel de surcharger le peuple par la force des armes, comme on a veu ces iours passez les prisons remplies en toutes parts du Royaume de France du pauvre peuple, faute de ne pouuoir payer cette grande quantité de diuerses natures de surcharges.

8. Qu'il a fait effort vers les Hollandois de faire rompre leur paix avec l'Espagne à deux fins. l'vne pour prendre suiet de faire la guerre avec eux, & l'autre à dessein d'accuser le Duc de Longueville de n'auoir pas bien menagé ou negocié cét affaire à Munster: mais les Estats des Pays-bas qui obseruent vne Politique pratique, trouuent mieux dans cette paix leur compte, comme ils ont fait voir à Mazarin par cette



briefue suppuration de dire cinq & cinq font dix, qu'ils ne raioient point dans les belles parolles & promesses, veu que les artifices leur demostroient que pour trouuer leur compte & le mesme nombre de dix, cela se feroit par cette addition & cet ordre de dire vn, & vn font deux & vn font trois, & ainsi de suite, ils trouueroient le mesme nombre de dix: mais eux comme tous les autres Estats abhorrent le procedé du Mazarin & blasment extremement les François de souffrir qu'à leur confusion les affaires du Royaume se manient par vne personne seule & de ce calibre.

9. Qu'il a fait expedier des pouuoirs de la part du Roy à des particuliers pour se mesler dans les compagnies, & descouurir ceux qui avec liberté disoient leurs sentimens, afin de les accuser en mesme temps: & ces infames qui seruoient de tesmoins, estoient deschargez & absouz de toutes leurs mesdisances; artifice qui estoit inuenté pour empescher les François de se plaindre de ses crimes. Mais le Parlement de Paris ayant connoissance d'une telle inquisition introduite en France à la mode d'Espagne en a reprimé l'usage, avec deffence à qui que ce soit de se seruir de semblable lascheté, à peine de la vie.

10. Qu'il a obligé des Capitaines des Gardes de quitter leurs serui-ces dont la generosité & l'amour de leur patrie a reietté le profit qu'on leur offroit pour aller escorter l'establissement des nouuelles leuées sur les peuples, & afin de porter les autre à suivre les mouuemens. Il les flatte en particulier de belles parolles & de grandes esperances, les exhortans chacun de chercher quelque affaire pour demander, afin de les persuader qu'il peut tout, les estoigner ou les changer, & pourtant ne laisse pas de les fourber: car lors qu'aucun d'eux trouue quelque chose à demander, ce Sicilien dit qu'elle n'est pas bonne, ou qu'elle est donnée, ou bien comprise dans quelque traitté, sinon il la fait changer de face, & l'enveloppe dans quelque party, soit pour en profiter, soit pour en gratifier ceux de sa Nation qui le seruent, & est d'humeur tellement auare, qu'il ne reconnoit point les gens genereux, ny les sçauans.

11. Qu'il a fait establir des fuzilliers dans les Prouinces qui ont serui à bourreler nos pauures Compatriotes, & bien que le Parlement de Paris ait fait reuoker les Intendans, & deffendre l'usage de ces fuzilliers, & des prests sur les tailles, neantmoins tout cela a esté de nouueau



par le Mazarin, qui a enuoyé en diuerſes prouinces, dont le ſieur Foulé eſt l'un de ces Intendans, qui avec ſes fuzilliers a commis vers le Limosin des violences inhumaines & barbares, empeſchant la voye directe & ordinaire des Officiers des Tailles, qui apportotent les deniers à l'Eſpaigne dans les coffres du Roi, comme ils ont fait de tout temps.

12. Qu'il a ſurpris la Reine & les Princes, leur faiſant entendre qu'ils eſtoient tenus & obligez d'appuyer l'authorité Royale, que le Parlement de Paris ſietriſſoit ſelon ſon dire; quoy que le Parlement ne ſe portait qu'à reprimer les dangereux procedez du Mazarin vers les peuples pour le bien de l'Eſtat & le ſeruice du Roy. L'intention de ce fourbe eſtoit d'eſmouuoir les peuples, contre le Parlement, & de rompre l'vnion qui a touſiours eſté, ſe ſervant de meſdisances de toutes ſortes qu'il faiſoit ſemer par Paris, comme entr'autres par la Raliere, qui alloit diſant, que le Parlement auoit pris reſolution de faire comme celui d'Angleterre, & en ſuite par le Cheualier de la Valette reſpandre des billets infames, qui pour cette laſcheté fut emprisonné, & euſt eſté puny ſans les preſſantes & puiffantes ſollicitations. Le Mazarin preſumant que cét artifice partageroit les habitans de la ville de Paris d'avec le Parlement, & attireroit des vns & des autres vne haine generale vers le Prince de Condé, bien qu'il n'agiſſoit que par le commandement de la Reine avec ſon Alteſſe Royale, la Reyne portée à cette entrepriſe par la ſuſcitation de ce Cardinal.

13. Qu'il a fait diuertir le fondsides rentes de l'hoſtel de ville de Paris, des droicts & gages des Officiers de Juſtice, & par ce moyen en a fait ſouffrir nos Compatriotes de Paris & d'ailleurs, & fort incommodé leurs familles, & par l'accroiffement enorme des Tailles, a mis nos François qui habitent la campagne dans l'impuiffance, & fait mourir en languiffant vne quantité innombrable de familles.

14. Qu'il a fait donner Arreſt au Conſeil d'enhaut portant que le Parlement de Paris ſeroit tranſferé à Montargis, afin de faire obeyr & ſoumettre apres cela toutes conditions de perſonnes à ſes exactions.

15. Qu'il a eſloigné & rompu les deſſeins qu'on a fait ſouuent paroître de conuoquer les Eſtats Generaux tres-importans, & tres-neceſſaires d'eſtre conuoquez aujourd'huy, qu'il porte les affaires du Royaume à des deſordres extremes & au deſeſpoir.

16. Qu'il



16. Qu'il a surpris le Duc d'Orléans, le persuadant que le Prince de Condé vouloit entreprendre sur son Altesse Royale, afin de les mettre mal ensemble par des souplesses dont il surprend vn chacun pour empescher la descouuerte de ses crimes eminens, dont il craignoit la punition: s'en deuoit faire par ces Princes, qu'il voyoit de bonne intelligence: cherie, & tousiours cultiuée par le Prince de Condé, & a present il veut persuader que les Princes s'en prendront contre sadite Altesse de leur emprisonnement & autres personnes, comme s'ils ne voyoient pas bien, comme tout le monde le dit, que cela s'est fait par l'artifice du plus perfide & melchant homme que iamais la terre ait porté.

17. Qu'il a pratiqué diuers moyens pour se deffaire du Prince de Condé aux armées, & principalement en Catalogne, entre autres par vn Espion de nation Italienne, nommé Iouan Fredidy, qui porta parole asseurée aux ennemis, que le Prince de Condé ne receuroit pas de secours d'argent ny d'hommes que le Mazarin luy faisoit esperer par des lettres de cachet, qu'il fait escrire comme il veut, l'animant à se picquer, & de s'opiniâstrer au siege de Lerida. Cela ne luy est pas nouueau de trahir les Princes: car il a trahy le Roy d'Espagne son Prince naturel à Cazal & ailleurs, & ses meilleurs amis par tout.

18. Qu'il a dans la place Dauphine nuictamment formé vn guet à pan contre la personne du Prince de Condé, mais ce Prince en estant adverty & ne pouuant se persuader ce guet à pan, il y fit passer son Carosse pardeuant avec vn Laquais dedans, sur lequel fut tiré plusieurs coups de pistolets, dont il fut blessé d'vn, si bien que les assassinateurs abordans le carosse, & ne trouuant pas de quoy executer leur ordre, se retirerent, & le Mazarin picqué d'vne extreme ialousie contre la fidelité, des conquestes & batailles de ce Prince, & preuoyant que ce Prince commençoit à se desabuser, que par là son chastiment estoit ineuitable, tascha d'obscurcir vn attentat si abominable, donnant ordre aux nouueaux assassinateurs, après auoir manqué ce coup, de faire feu sur le President Charton & Ioly, Conseiller



au Chastelet de Paris, Scindics des Rentiers, qui estoient dans vn mesme carosse. Ce dernier demeurant blessé, les assassinateurs s'euaderent adroittement à la rumeur de ce procedé. Le Mazarin accuse soudain les Frondeurs d'auoir fait vne sedition premeditée, & reiette sur eux le guet à pan, qui ne luy auoit reüssi, en quoy il surprend le Prince de Condé, que c'estoit les Frondeurs, quil'ayans manqué à la place Dauphine, le vouloient perdre par le moyen de cette sedition, si bien qu'il le porta de pousser le Marquis de la Boulaye, & d'enuelopper en suite le Duc de Beaufort, Monsieur le Coadiuteur & toute la Fronde. Cependant le Mazarin se met en peine de chercher des faux tesmoins à force d'argent, afin de faire affirmer sa supposition, & que ce guet à pan fait de sa part ne fust point esclaircy, & d'vn autre costé, il ne s'espargne point de persuader la Reine, que ce Prince auoit de mauuais desseins, quil inuente si bien, quil l'a portée de le faire emprisonner avec les deux autres Princes, à la faueur de cette haine quil a fait naistre artificieusement entre ce Prince & les Frondeurs, & incontinent apres il fait agir, & fait descharger les Frondeurs de cette fausse accusation, & leur fait entendre que ce Prince leur ioüoit cette piece pour les faire perdre tous. Apres quoy sur le bruit que les Parisiens faisoient de cette detention des Princes, le Mazarin menasse Paris de luy opposer le Prince de Condé, & de s'accommoder avec luy, & voila comment cét Estranger nous ioué à tous.

19. Qu'il a fait faire cette proposition par la bouche de la Raliere, & autres infames partisans, sangsüés du peuple, d'envelopper aux Tailles les privilegedz & toute la Noblesse, souz pretexte d'vne precise necessité des affaires importantes, a quoy les Princes n'ont voulu iamais consentir, & ne cesse point d'exhorter les partisans de mediter quelques leuées, pour le quelles il fait executer toutes sortes de violences, & en suite rend criminels de leze Maiesté les habitans des villes qui reponssent sa tyrannie.

20. Qu'il a voulu par le mesme la Raliere seduire les Mariniers & autres habitans de Paris, pour les porter contre le Par-



lement, les exhortant d'aimer son Eminence tyrannique, & de n'estre plus Frondeurs: mais le credit de la Raliere partisan, n'a rien pû operer sur la fidelité de ce peuple.

21. Qu'il s'est seruy du mesme la Raliere, pour restablir la diminution qu'on auoit accordé de faire sur les entrees de Paris, pour indamniser les habitans de la guerre excitée contre cette Ville par cet Eminent fourbe, qui a fait innouer aussi aux traittez de Patis, Roüen, Bourdeaux & d'Aix.

22. Qu'il a fait mourir de faim vne infinité de familles à Paris & ailleurs par des grandes chertez de grains, causee par la guerre de cette Ville, & deuant cela par vne tres-grande quantité de passe-ports qu'il a fait expedier pour le Ponant & pour le Levant, à Gargant & à Cantariny qui luy en ont baillé huit cens mil liures: & en consequence de ces passe-ports, ont tiré vne prodigieuse quantité de grains par la riuere de Seine, de la Bourgogne, Champagne, l'Isle de France & autres lieux, qui fournissent Paris, comme aussi des autres Prouinces, qui fournissent les autres grandes Villes, où ces desordres ont produit les mesmes chererez.

23. Qu'il veut introduire cette maxime, que le Roy ne doit point tenir sa parole à ses suiets; maxime qui est de pernicieuse consequence contre la seureté publique, le droit des gens & la foy inuiolable que les Princes doiuent d'autant plus garder, que c'est la Loy des hommes fondee sur celle de Dieu; En fin il renuerse les Loix fondamentales du Royaume, afin d'establir des leuees de toutes façons, & sa tyrannie chez tous tadt que nous sommes de François.

24. Qu'il a fait offrir au fils de Brousselles, Conseiller au Parlement de Paris, cinquante mil escus, & vne compagnie au Regiment des Gardes, pourueu qu'il voulust remettre la Bastille, où il commande pour son pere, à qui Paris l'a donnée en garde, iusques à la moiorité du Roy; mais cela n'a pas esbranlé le fils non plus que les diuerses offres, & les menasses que le Mazarin a faites au pere, qui est toujours d'humeur esgale pour le service du Roy & du public.



25. Qu'il tasche de préoccuper sa Maieſté de haine contre les Parisiens, Normands, les Bourdelais & ceux de la Ville d'Aix, la persuadant par vne supposition si noire & si horrible, que tous ces peuples-là auoient pris dessein de faire ainsi que les Anglois auoient fait en Angleterre.

26. Qu'il a pris Belle-garde, afin qu'à cét exemple les François regardent son Eminence Mazarine de ventre à terre, comme il pretend; mais vers Bourdeaux & en plusieurs endroits, l'on luy dit, n'en as-tu point d'autres.

27. Qu'il a par ses finesſſes voulu surprendre les Parisiens, ayant fait distribuer à dessein au menu peuple quelque bled de sa part à mesme temps que les trois princes furent emprisonnez, cette distribution portant aux despens de ses Partisans, qu'il ne duppe pas moins par ceste adresse, leur disant que c'estoit à cette heure qu'il tenoit M. le Prince garand des Bourdelois, qu'il les chastieroit bien, afin de travailler apres librement aux affaires du Roy: c'est ainsi qu'ils appellent les affaires des monopoles, & qu'en distribuant ces bleds, ils attireroient l'affection des peuples vers luy, & la haine sur ce prince, faisant entendre qu'il vouloit perdre Paris, & partager l'Estat; mais quelque sollicitation que ces maudits partisans ayent fait, soit en donnant ces grains là, soit vers les autres peuples pour les gagner, l'on ne laisse pas d'y crier hautement point de Mazarin, & d'y dire de plus. Qu'ils ont grand tort, & qu'il n'en falloit pas faire à deux; c'est à dire, qu'ils se repentent bien fort de ne s'estre point faisi & emparé de sa personne, apres auoir fait rendre celles de Brousselles & le Nam, Conseillers en Parlement; où se sauuera-t'il donc? puis qu'il est hay de Dieu & des hommes.

28. Qu'il a fair perir des Armees, & laissé expressement prendre des Villes, afin d'entretenir plus long temps la guerre pour se faire redouter; & à present il abandonne, non seulement la Catalogne, mais encore hazarde plusieurs prouinces de ce Royaume.

29. Qu'il pretend par sa tyrannie venir à bout des vns, les faisant



faisant seruir d'exemple, tandis que les autres seroient contrainsts de le reclamer, & de luy obeir par force, faisant parade qu'il peut tout souz ce pretexte de l'autorité Royale, dont il se couure abusiuement & criminellement.

30. Mais nous voyons bien aussi qu'il traite les Princes de mesme air qu'à fait le Marquis d'Ancre de sa nation; Tant y a que ceux qui de nous feront vn bon haraut sur sa personne, rendront vn signalé seruice au Roy & à toute la France; & outre cela, acquerront en propre les piereries qu'il tient sur luy par precaution, & quoy qu'en peu de contenance, neantmoins de la valeur de quinze millions, ainsi que les Orfevres & les autres personnes qui se messent d'en vendre ont donné memoire qu'il en a fait achepter pour ce prix-là lors de la guerre de Paris, dans le dessein qu'il prit d'en faire sortir le Roy, comme vn chacun sçait.

30. Qu'auoit fait Boutellier, pour luy auoir osté la Sur-Intendance, sinon qu'il n'a pas voulu adherer aux volonteiz du Mazarin?

31. Qu'a fait Chauigny pour l'auoir obligé de se demettre de sa charge de Secretaire d'Etat du Ministere, & du gouuernement du Bois de Vincennes, sinon la mesme chose.

32. Pourquoi a-t'il fait porter le President Bailleul de se demettre de sa Sur-Intendance, sinon qu'il n'a peu rien gagner sur sa probité.

33. Qu'a fait le Marechal de la Motte, qu'il a si mal-traitté, sinon de ne vouloir point faire ce qu'il desiroit.

34. Qu'a fait le Duc de Guise, n'a-il pas fait ce à quoy le Mazarin l'a porté, l'ayant flatté de l'esperoir d'vn grand secours, pour luy faire entreprendre l'affaire de Naples, où il l'a laissé embarrassé.

35. Qu'auoit fait le Duc de Beaufort pour luy auoir fait souffrir vne si longue prison, & d'auoir prins dessein de se deffaire de sa personne, soit par poison ou autrement? Que luy a fait le Coadiuteur de Paris, qu'il menasse de faire écarteler selon son terme ordinaire; & qu'elle seureté peuuent pretendre



ces deux personnes d'une ame si noire & si perfide, qui ne cherche que de leur faire piece à son tour, & vne Mazarinade, quelque posture ou grimasse qu'il leur fasse?

36. Que luy auoit fait le President Barillon, sinon de luy faire accroire qu'il auoit eu quelque intelligence avec le Duc de Beaufort?

37. Mais que luy auoit fait le bon homme de Brousselles & le Nain, Conseillers au Parlement de Paris, qu'il fit ainsi enleuer au sortir du *Te Deum*, qu'on venoit de chanter pour la quatriesme Bataille gagnée par le Prince de Condé, sinon d'estre zelez pour leur patrie, & le seruice du Roy.

38. Que luy a fait le Marechal Ranzau, qu'il a fait emprisonner, sinon de n'estre point voulu venir lors de la guerre de Paris, ainsi que le Mazarin le vouloit.

39. Que lui a fait Perrant, Intendant du Prince de Condé, & President des Comptes, pour l'auoir fait emprisonner, sinon à fin de l'empescher d'agir, & de descouurir les artifices & trahisons dont Mazarin vse contre le Prince de Condé son Maistre?

40. Qu'à fait la Riuiere, sinon que le Mazarin apprehendoit en ce rencontre qu'il le pourroit nuire en esclaireissant Son Altesse Royale de tant de fourbes & de ruses, dont lui-mesmes a esté traité & flatté du Chapeau de Cardinalat, pour tant d'aggreables seruices qu'il lui a rendus?

41. Qu'à fait le Chancelier pour l'auoir disgracié, sinon d'auoir plusieurs fois représenté au Mazarin qu'il estoit necessaire de moderer les choses.

42. Mais nous vous prions qu'auoit fait les peuples de Paris, Roüen, Bourdeaux & Aix, que d'auoir repoullé les tyrannies, comme l'on fait encores vers Bourdeaux; Ville qui a esté obligée pour le seruice du Roi, pour son salut, de se deliurer des entraues du Chasteau Trompette, comme elle le declare par le Manifeste qu'elle a publié.

43. Qu'à fait Madame de Longueville, qu'il a persecutée, parce qu'elle alloit reclamer la iustice au Parlement de Roüen?

44. Qu'à fait la Princesse de Condé Douairiere, pour estre



exilée, & pour estre empeschée de poursuiure sa requeste au Parlement de Paris, tendante à faire le procez aux trois Princes ses enfans, conformément à la Declaration du mois d'Octob. 1648. apres qu'une infinité de personnes ont iouy du benefice de cette Declaration, qui donne la seureté publique.

45. Qu'ont fait la Princeesse de Condé & le Duc d'Anguien son fils, pour estre persecutez si cruellement par ce scelerat, & pour auoir esté obligée de se refugier en vne ville frontiere du Royaume. Et qu'à fait son fils, qu'il faille que le Mazarin aye osté le Roy de Paris, où la presence de sa Maiesté est si necessaire, veu que la France est assaillie à main armée pour le conduire à Bourdeaux, afin qu'à la presence & faueur du Roi, il puisse faire declarer cette ville criminelle, & la prendre encores qu'elle soit au Roi, pour auoir receu comme nous auons dit, cette Princeesse & son fils le Duc d'Anguien, Ville qui s'estimeroit criminelle & tres-inhumaine, si elle ne les auoit pas receus comme elle a fait, avec tres-grande affection & compassion de la misere de ces Illustres personnes qui doiuent estre si cheres & si precieuses à toute la France, ruinée & bouleversée par le ministere infame Estranger, qui pour se vanger des Bourdelois, quoy que tres-fideles & tres-zelez au seruice du Roi, ne laisse pas de risquer tout, iusques aux personnes de leurs Maiestez & celles du Duc d'Aniou, qu'il conduit en la ville de Libourne, où la peste est, & la famine extreme.

Il faudroit vn tres-gros volume pour descrire tous les crimes de cét homme, de qui les meschancetez execrables ne trouuent point de termes que foibles & peu significatifs.


De dire qu'il ruine le Royaume, qu'il met à feu & à sang, cela n'est pas assez, nous ressentons plus de maux de cét homme que nous n'en pouuons dire.

En fin nous nous deuons esueiller, de sabuser & porter nos pensées pour l'exécution d'une Requeste des trois États publiée à Paris, qui porte que le Mazarin sera pris au corps, & pour l'Arrest de la condamnation donné par le Parlement de Paris.

A quoy tient-il donc, que nous n'allions fondre dans les pri-



Cons pour deliurer les Princes , afin qu'en leur presence & par leur assistance l'on punisse l'Autheur de tant & de si detestables crimes capitaux.



**C**HER FRANÇOIS , Nous te conjurons de donner cecy à lire à tous ceux que tu pourras, afin que ceux qui agissent en faueur du Mazarin, ou qui le seruent de leurs personnes, connoissent que c'est souz des pretextes déguisez & faux , & que la posterité leur reprochera qu'ils auront trempé leurs mains dans le sang de leurs parens & Compatriotes, pour faire reussir la tyrannie d'un Estranger , laquelle tomberoit sur eux aussi bien que sur ceux qui la repoussent en rendent des veritables sentimens au Roy & à l'Estat.

Et vous qui voulez acquerir de l'honneur par les Armes, considerez le sensible desplaisir que le Chevalier de la Valette a eu de mourir dans ce party d'un coup receu à l'Isle S. George ; & la satisfaction & l'honneur qui demeure à la memoire de ce Cavalier RICHON, d'estre mort pour le service du Roy & celuy de sa propre patrie, comme tesmoigne son ELOGE FVNEBRE, avec la benediction de tous les gens de bien.





